

Hubentud **DEN** Movecion

Pa: Mercedes Abdul

TRADICION, CULTURA Y FIESTA CARNAVAL TA NIFICA PA STUDIAntenAN DI JULIANA SCHOOL



Pa e personal docente y alumnado di Juliana School Juliana celebracion di carnaval a bira un custumber for di hopi aña caba y te hasta por bisa cu dicho school ta e cuna di e sentimiento di union pa tur school bin hunto y participa den carnaval, cu eleccion di reina, trahamento di disfraz, y intercambio di opinion relaciona cu e fiesta grandi aki.

Alumnonan di e klasnan 3de-A y C, di Juliana School, bao di guia di e dos maestranan Rugia Mauricio y Geraldte Campos, a bin hunto pa trata e tema "Carnaval for di punto di bista di nos hobennan", unda cu Seccion Hubentud den Movecion tabata presente. Pa e grupo di studiantenan aki Carnal ta un tradicion na Aruba, pero tambe ta un aspecto cultural cu ta refleha e creatividad di e ser Arubiano, tanto adulto como hoben.

Un actividad di gran colorido cu ta acumula tur elemento artistico: expresion corporal, musica popular, vestuario, etc. combina cu e gracia y alegria di tur esnan cu ta participa.

Juffrouw Campos carnaval ta un di e partinan cultural di

Aruba mas importante. E ta enriquece mas cada aña cu participacion di mas grupo. Despues di e carnaval 40 e gruponan a sigui crece y e ta kere cu pa carnaval 45 lo yega un punto unda e celebracion lo bay bira mucho mas grandi atrobe.

COMPORTACION

Un aspecto fundamental pa nos hubentud ta un comportacion alegre y divertido durante carnaval, pero cu limite. Esaki ta nifica no propicia ni participa den bringamento. E studiantenan aki ta indica cu bebedad di bebidanan sterki of uso di droga no ta pass cu e esencia di carnaval y esaki mester worde evita den nos hubentud.

Pero nan ta kere tambe cu esnan cu mester duna ehemplo ta e mayoran mes.

"Si un mucha ta wak su tata ta bebe di mas durante carnaval e ta sinti cu e tambe por haci mescos. Pesey adultonan mester duna e bon ehemplo pa no haci nada fuera di lugar durante carnaval", segun comentario haci den klas.

Riba e mesun rosea di comportacion e alumnonan aki NO ta di acuerdo cu e perso-

nanan cu cada vez ta relaciona carnaval cu salimento na estado di mucha muher.

E frase "conta 9 luna despues di carnaval y wak ta cuanto mucha muher ta haya yiu" no tin validez pa nan, pasobra nan ta indica cu despues di cualquier otro actividad hubenil cu tin hopi na Aruba durante aña of despues di un simple fiesta, tambe por conta 9 luna y haya e resultado menciona den un ke otro hobencita.

Loke nan kiermeen ta cu no mester señala un temporada specifico, manera carnaval, pa un pareha di hoben comporta di e manera menos responsable. Esey por sosode na cualquier momento, hopi biaha pa falta di concientizacion, guia, orientacion, atencion, etc. etc. Y no mester huzga mayoria di hoben pa loke algun di nan ta haci. Ambos Juffrouw ta opina cu tin cierto grupo di hende den nos comunidad cu ta contra carnaval y contra hubentud, y podise nan ta trata di kibra ambos relacionando carnaval cu embarazo hubenil. Nan ta purba destrui nan cu comentarionan asina, loke ta algo hopi negativo ya cu di un banda nos hubentud lo guia Aruba mañan y di otro

banda, carnaval ta importante pa turismo. Cantidad di turista ta pendiente di bini Aruba pa carnaval y cu hopi anticipacion nan ta reserva nan ticket di avion y nan hotel.

Cu otro palabra tras di e idea aki por tin mal intencion pa kibra e dos pilar di Aruba: turismo como base di Aruba su economia y hubentud como motor di Aruba su futuro.

USO DI TENT

Tanto pa e alumnonan como pa e dos maestranan e facilidadnan di tentnan publico cu ta worde poni canto di caminda pa wak carnaval pasa ta masha bon. Solamente cu casi no ta restando lugar pa pone mas pa motivo cu mayoria espacio ta worde ocupa cu cavelnan.

Nan ta haya lo ta bon si por aumenta e facilidadnan di tent, pero tambe pa e publico en general respeta cu ningun hende ta doño di e lugarnan aki. Esaki pasobra hopi hende for di madrugada cabata bin para nan auto den e tentnan publico aki comosifuera ta di nan propiedad. Na nan opinion mester bin cu un

reglamento mas severo encuan to uso di tent.

Algun hoben ta menciona cu lo ta bon si algun tribuna publico por bin acerca anto cu su afdak grandi.

Tambe nan ta indica cu mester tin mas control riba paramento di autonan den cruzada, loke ta un problema serio durante carnaval.

FACILIDAD PA TURISTA BEBE AWA

Segun varios estudiante mester pone cierto facilidadnan specifico pa e turistanan, manera puestonan unda nan por haya awa durante e paradanan di carnaval.

Nan ta indica cu aña pasa un grupo di Venezolano a bin Aruba pa e temporada aki y nan no a haya un lugar pa bebe awa. Na mitad di caminda nan tabata masha cansa caba.

Nada no ta worde prepara pa e turistanan cu hopi biaha ta bin pa prome vez y no sa con nos carnaval ta y ki sorto di facilidad nan por haya.

Pa hende local esaki no ta problema pasobra mayoria bez e famianan ta bin prepara cu cuminda, refresco, awa, ice, etc.etc.



TELEFONNAN DI DIARIO
26747- FAX 28551